

四庫全書

史部

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十四

治河二

康熙四十一年壬午五月壬辰戶部題江南賑濟  
盱眙等三縣水災饑民米數

上曰前議加築高家堰堵塞唐埂六壩時朕曾言如此修  
築雖有濟於下流其上流州邑必致衝決今信如朕言

觀此散糧之事盱眙等三縣大被災害若昔議築高家堰之日於此處亦築一隄束其水勢不令泛溢豈不甚善該督斯時慮不及此卒令此等地方悉受泛溢之水今欲修難矣其令張鵬翮往勘以聞

九月甲子河道總督張鵬翮疏言桃源縣烟墩一帶因對岸沙灘挺出河心逼溜南行恐被衝刷請於北岸邵家莊開挑引河建築草壩以分水勢又顏家莊水勢逼射北岸亦請開引河一道則水流

順下而險工不受衝激矣

上諭大學士等曰此本若敕部議必致遲延著即照所題行朕觀永定河修築之法甚善河身直河底深所以淤沙盡皆衝刷今治黃河亦用此法方為有益此工多費不過十萬兩試照永定河修治之

丁卯河道總督張鵬翮疏報秋水情形

上諭大學士等曰覽奏挑水壩築成逼黃河大溜直趨陶莊引河循北岸而行黃水從大通口暢出海口極其深

通淮水從清口暢流敵黃絕無黃水倒灌之患高家堰隄工完固加謹防守經伏秋大漲俱獲無虞運河水由涇河澗河人字芒稻等河分洩各處工程亦皆保固觀此河工大有望矣又

諭曰今所開陶莊引河甚善朕巡視南河時曾令員外郎黑碩色將引河之椿加意深築其疏濬人字芒稻二河亦佳得此二河運河甚為有益朕觀明朝治河俱自徐州以上在河南地方修築我朝自康熙元年以來俱在

徐州以下修築然治下流須預防上流若上流潰決下流必至壅滯嗣後徐州以上地方河臣亦當留意再黃河之水遷徙無定朕前在寧夏之時見黃河大溜每年更移今年在此來年又移他處其性如此況九河故道原在河間地方後漸移向南歷代以來果能每年防禦相機修理則河道何至如此大壞皆因時當多事或十年或五年不修築不開濬所以漸難治矣明朝三百年間嘗講求河工治法彼時措置亦得其宜如山東微山

湖將水蓄聚山中澇則蓄之旱則洩之皆深有益於治河者也

康熙四十二年癸未二月庚辰

上巡視河工舟泊天妃廟

諭河道總督張鵬翮曰歸仁隄引河用以分洩洪澤湖之水勢若黃水加長則恐清口水弱著將祥符閘下板堵閉草壩將五堡閘酌量開放以助清水之勢

三月戊申

上諭河道總督張鵬翮曰高家堰工程關係重大保守最為緊要朕今日乘舟由洪澤湖閱視見有殘缺石工以葦草鑲填倘遇水發危險堪虞至六壩見新修石隄堅固方慰朕懷其殘缺石工著即興修乘水未長之先完工用資捍禦至高家堰防險之人用候選縣丞經歷等微員此不過例監書辦出身家產微薄倘有疏忽干係不小須於候選官員內擇其職銜稍大身家殷實者委令防險如此則彼知自愛身家又有選用之望自能盡



心防守有裨工程

十月己卯

上諭大學士等曰朕觀河道已治河道總督張鵬翮及河工官員俱甚効力黃河一切工程朕知之甚悉先是永定河用埽甚有裨益是以朕諭張鵬翮黃河亦宜用埽張鵬翮回奏永定河勢小可以用埽黃河勢大難以用埽朕諭姑用之張鵬翮因而用埽河隄今果堅固至於洪澤湖水勢甚險而隄岸復高往來舟楫一遭漂没人

命輒難救援朕曾諭沿岸將長木椿斜釘於水中船雖漂没人尚可攀援獲命俟於釘椿後驗之

是日

上諭吏部工部黃淮兩河關係運道民生最為重要朕念治河國家大事夙夜塵懷未嘗少釋披圖咨衆雖已悉其源流顧水勢變遷不常必確知洞悉方可實見施行是以不憚勤勞屢親巡閱察其險易之形勢審其疏導之機宜緩急次第俱有成畫至於簡命河臣倚任甚切

凡所屬官吏皆聽舉用大修工程費以數百萬計歲修帑金亦以數十萬計乃康熙三十七年黃淮並漲河道總督董安國不堅築隄堰疏通海口因而河身墊高溢出河岸以致倒灌洪澤湖口湖水從六壩旁洩由運河入下河淹沒民田於是罷董安國以于成龍代之朕隨授以治河方畧詳加指示康熙三十八年親往閱河駐蹕清口河干又面諭于成龍清口宜築挑水壩挑黃水使趨北岸方可免倒灌清水之患隨指定其地再三申

命于成龍不遵朕旨致無成功及用張鵬翮為河道總督面諭云頃已發帑金數百萬令大臣官員往高家堰築隄閉六壩使逼洪澤湖水暢出清口而清口築挑水壩尤為緊要此壩不築則黃水頂衝斷不能使向北岸湖水必不得暢流張鵬翮遵奉朕言壩工築成黃溜遂直趨陶莊清水因以直出疊經伏秋大漲竝無倒灌之事其浚張福口等引河築歸仁隄疏人字芒稻涇澗等河開大通口皆遵朕旨一一告竣今年春朕閱河至桃

源見龍窩等處頂衝危險命增築挑水壩壩工刻日訖  
事河勢遂平中河仲莊閘口以與清口相對特命改由  
楊家莊漕輓安流商民利濟曩時黃水泛漲或與岸平  
或漫溢四出今黃河深流河岸距水面丈餘縱遇大漲  
亦可無虞矣張鵬翮所修工程雖悉經朕裁斷而在河  
數載殫心宣力不辭艱瘁又清潔自持一應錢糧俱實  
用於河工無纖毫浮耗朕心深為嘉悅所屬大小河員  
竝皆勉力赴工共襄河務亦屬可嘉自總河以下各官

爾二部即加議敘具奏

康熙四十四年乙酉二月庚寅

上巡視河工舟泊土橋閘

諭大學士等曰河道總督張鵬翮昨日來問以河工形勢  
彼云河已治矣從前駱馬湖口設竹絡壩湖水大則從  
壩流入黃河河水大則溢流入壩內今竹絡壩止有湖  
水暢流黃水竝無浸灌則黃河之深通可知聞下河等  
處地方連年皆大熟亦從前所未有也

三月乙巳

上諭河道總督張鵬翮曰河工已經告成善後之策更為緊要朕今親臨閱視修建天妃閘甚當倘黃水長至五六尺而清水不長則勢弱不能敵黃黃水倒灌亦必致之理豈可因此即謂治河失策乎若遇倒灌即將天妃閘暫時下板蓄清水全力以敵黃流不過數日黃水即退遇糧船過時即起板開放若黃水不灌入不必下板其惠濟祠一帶雖建有石工但運河與黃河止有一線

之隄若黃溜衝刷石工恐不足恃可於上下適中之處相度形勢修建挑水壩三四處挑溜開行其王公隄亦應相度形勢修建挑水壩其運河東隄保守最為緊要隄岸應行加幫其高郵迤南湖河水勢相平界首迤南河水高於湖水東西兩隄卑薄應加幫修可量建石工淮安近城隄岸卑薄之處亦應相度形勢修建石工黃河南岸隄工關係緊要應加謹修防至於直隸山東之河與河道總督相距甚遠應照河南例各交與該省巡



撫就近易於料理其楊村通判竝無經營之事應行裁去爾會同行在九卿速議以聞

壬子

上諭河道總督張鵬翮及河工官員等曰今河工雖已告成不可不預為修理防護以圖善後之策朕見淮揚一帶隄岸卑薄未甚堅固倘不加保護以致衝決則淮揚地方百姓何以能堪爾等宜急籌之

閏四月癸卯

上幸高家堰遍閱河隄

論河道總督張鵬翮曰朕於康熙四十二年臨閱高家堰時爾奏石隄可於八九月間告成今已三年尚未完工萬一水大奄至恃此草埽詎能禦之張鵬翮奏曰必能保固斷然無害

上曰草埽俱經二三年矣腐爛沉塌者多猝遇大水事難預料如不謹慎修築被水衝決枉費錢糧姑置無論但去年已奏河工告成今年又奏衝決其謂之何爾須日

夜謹守保護夫治河莫要於得人觀爾所用之人每多有失豈可倚任此輩分守此隄耶爾等惟見清口之水暢流即以為功成不思防禦倘高家堰六壩之水泛溢則清水力弱而黃水必復致倒灌矣夫高家堰關係緊要宜謹識之毋忽

是日

上幸惠濟祠閱視畢

諭大學士諸大臣及河臣等曰朕留心河道親閱者屢矣

河之形勢必身歷其地始知成功之次第朕每至河上必到惠濟祠以觀水勢康熙三十八年以前黃水泛濫凡爾等所立之地皆黃水也彼時自舟中望之水與岸平岸之四圍皆可遙見其後水漸歸河岸高於水今則岸之去水又高有丈餘清水暢流逼黃竟抵北岸黃流僅成一線觀此形勢朕之河工大成矣朕心甚為快然也

乙巳

上諭河道總督張鵬翮曰惠濟祠前植標杆處可建挑水壩祠後埽灣處亦宜建挑水壩以保淤灘但此二處挑水壩俱不宜太長恐逼水盡向北岸有礙楊家莊河口至卞家莊舊壩修建甚佳再畧加寬長更善

丙午

上諭河道總督張鵬翮曰九里岡隄工修理得法不似從前直埽不能挑溜今修魚鱗埽逐段挺出逼溜開行使窪處漸淤此法甚善其埽工釘椿處可再建挑水壩二

座若恐水深則先建磯嘴壩形出水俟其壩下漸淤層次加修則料不加多而功易成矣

七月壬申

上諭大學士等曰今春朕欲親閱高家堰張鵬翮奏稱隄岸工程俱完又時當炎暑蚊蟲正起求停止親閱懇奏再四朕以高家堰關係甚大親往閱視見石隄尚有未完之處所下之埽已經二三年者朽爛亦多將此情形一一指示張鵬翮及河工諸臣朕又諭張鵬翮大水時

發難以預料爾務須晝夜防護至分守隄工人員委用不當朕亦論及今據張鵬翮疏報古溝唐埂清水溝韓家莊四處隄岸衝決河工將有復壞之勢大小河員惟知清水暢流為已功而不知高家堰之六壩水洩太多則清水力微黃水必復倒灌也此事著九卿詹事科道速行會議具奏

丙戌

上諭大學士等曰凡人必試之而始知張鵬翮多疑今即

遣旗員前去未嘗一試而張鵬翮早疑其不清人亦何  
心為彼効力夫高家堰之隄全當洪澤湖之水開六壩  
雖民田畧有衝沒淮揚地方斷無可虞如以為利益民  
田而閉六壩萬一大水驟漲而隄決淮揚大有可虞矣  
是以前總河靳輔開六壩以注水漲張鵬翮但知閉六  
壩則運河民田均有益而不知為淮揚之大患高家  
堰之所關甚為緊要也

十月甲午



上諭工部方今海宇昇平惟以安阜黎元為急東南要務莫重於河防朕數經南巡指示修築方略凡以籌運道濟民生也自曩歲兩河先後衝決而黃流淤墊繼以高家堰唐埂六壩久決未塞而洪澤湖水直從決口旁洩以致淮水力弱黃水倒灌全河幾至潰壞於是分遣廷臣發帑金數百萬增築高家堰盡閉六壩俾淮水全注清口又特築挑水壩以逼黃溜趨向北岸仍開濬陶莊引河以導黃北流然後無倒灌之患康熙四十二年以

河工漸可底績躬親臨視時高家堰石工尚多未竣飭令迅速修築又因仲莊閘水勢湍急恐逼黃流倒浸清口遂命閉仲莊閘改建楊家莊閘閘工既成今年春復往巡閱比至高家堰見石工仍未完固舊埽亦多朽塌諄諭河臣張鵬副謂水勢無常修防宜豫一有疎忽則前功盡隳且甫奏安瀾旋報衝決天下其謂之何張鵬副奏稱隄工捍禦可以無虞迨伏汛大水驟發果衝決古溝唐堧清水溝等處淮揚一路田畝被淹者甚多今

已嚴飭堵塞決口刻期竣工朕屢親莅河干詳度形勢  
當水漲之時若高家堰及運河減水壩不令開放則隄  
堰甚為危險若開壩宣洩則閭閻隴畝必致淹傷方春  
水涸民間盡皆播種一經夏水驟漲開壩放流而所播  
之種盡皆淹沒朕心惻然殊為不忍使不設法導流俾  
水有所收束則瀕湖及下河民田究不免水患朕再三  
籌畫宜於高家堰三壩之下挑濬一河兩旁築隄束水  
引入高郵邵伯諸湖湖外亦量築土隄不使漫溢其高

郵減水壩亦挑濬一河兩旁築隄東水由串場河入白  
駒丁溪草堰等河白駒等河淤淺之處竝開濬深通俾  
之入海如此則各壩所出之水不致有渙散衝流之害  
又洪澤湖水勢大漲泗州盱眙等州縣俱被水災應於  
泗州一帶受水之地亦酌量築隄束水毋令泛濫則所  
全於淮安揚州鳳陽三郡民生者多矣此事原於河道  
無涉在河官止知保護河道不復詳計民生朕惟民間  
田畝所繫甚重宜圖萬全可久之策築隄束水行之北

河業有成效則施之南河當亦有濟應從何處築隄延  
袤若干里需費幾何行令江南江西總督漕運總督河  
道總督江蘇巡撫會同確勘詳議具奏

康熙四十五年丙戌正月己巳工部等衙門議覆  
江南江西總督阿山等疏言河工重大需餉浩繁  
伏候

皇上親臨河上指示方畧

上諭曰朕屢經躬閱河道凡河工利病地方遠近應分應

合應挑應築之處知之甚明雖有未及經歷之地而向來輿圖地名熟悉於衷亦可即行定奪邇者數次南巡見與陸路不同瀕河官民不無勞擾因此朕不必親往閱視阿山桑額張鵬翮等所看已屬周晰但此項工程不應交與總河修築應多派大臣官員分工速修

己卯

上諭大學士等曰朕昔親臨河上欲往下河因張鵬翮奏言斷不可往是以中止今即去仍然不能親莅其地則

亦何事復往但河工錢糧斷不可交地方官當照山東賑饑之例將八旗官及部院官內有行止端正者令該旗大臣及部院堂官多行保舉派出再將江寧鎮江杭州駐防旗員亦著該將軍副都統保舉派出或副都統或協領帶赴工上其京城派出官員領戶部錢糧帶往各省派出官員各就近地領錢糧帶往可派大臣督理工程所派官員每人各給銀三千兩務令照三千兩工價分地開工如此始得河務速成有利民生著九卿再

議具奏至高家堰若不預行修治必有可虞已有旨諭張鵬翮而彼堅稱斷斷無慮若今年不修治高家堰倘有衝決即開河何用此兩事中高家堰尤為緊要爾等可將諭旨付挑河大臣轉交張鵬翮一并議奏

壬午工部等衙門覆奏挑河事宜

上曰爾等所議尚有未詳至將情願往河工効力者令照山東養民例尤為不可山東養民者名為捐助及其後皆無實際所欠銀兩皆朕豁免況所去人員亦甚放縱



今挑河之事俱有丈尺稍或不實即悞公務而前去人員若仍行放縱尤貽害於地方爾等於嚴行禁止之處竝未議及著再議具奏

五月戊午朔

上諭大學士等曰去歲巡視南河曾於衆人前言高家堰隄工不堅尚宜增築張鵬翮以河工已完斷然無害朕謂爾雖言工完朕不能信及後隄工潰決幸是唐埂六壩上流若在下流衝決如何堵禦康熙七年九年二十

二年七里溝清水潭龍窩等處衝決之時其水甚大年水不甚大然而衝決者河臣自以為河工已完玩忽之所致也

十月辛丑

上諭大學士等曰河道總督報秋汛疏二十日方到朕屢次親閱河工洞悉情形如奏報水汛事早到則其中或有所指示猶可及時預防嗣後有奏河工急務者限兩三日飛馳遞送

康熙四十六年丁亥二月癸卯

上巡視溜淮套駐蹕曹家廟地方

諭扈從文武臣工及河道總督等曰前阿山等察勘泗州水勢奏稱溜淮套地方另開一河出張福口可以分洩淮水免洪澤湖之異漲保高家堰之危險繪圖進呈請朕親閱在廷諸臣亦以河工事關重大再四懇請朕始親行今詳看地勢甚高雖開鑿成河亦不能直達清口且所立標竿多有在墳上者若依所立標竿開河不獨

壞民田廬甚至毀民墳塚朕惟恐一夫不獲其所時存  
已饑已溺之心何忍發此無數枯骨數年來兩河平靜  
民生安樂何必多此一事先年靳輔開中河以避黃河  
之險確有成效然亦止因舊河身疏濬今若欲開濬溜  
淮套必至鑿山穿嶺不惟斷難成功將來汎水泛溢不  
漫入洪澤湖必致衝決運河矣又

諭曰明代淮黃與今迥別明代黃水勢強淮水勢弱故有  
倒灌之患朕自甲子年南巡閱視兩河形勢漸次修治

今則淮強黃弱矣然善後之策尤宜亟講與其開溜淮套無益之河不若將洪澤湖出水之處再行挑濬令其寬深使清水愈加暢流至蔣家壩天然壩一帶舊有河形宜更加挑濬使通運料小河俾商民船隻皆可通行即漕船亦可輓運為利不淺矣

乙巳

上諭河道總督張鵬翮曰爾身任總河河工事務漫不經心今又以溜淮套地方可以開河請朕親臨殊屬欺誑

張鵬翮免冠謝罪懇

恩寬宥

上曰賞罰者國家大權內而九卿外而督撫原為盡忠於國惠養斯民而設非徒使之榮顯晏安而已大吏廉潔則小吏自然效法苟不能勤慎致悞公事豈可因保全一人而廢國法乎凡事有可以保全者亦有當用剛斷者國家臣工甚多姑息一二人何以服衆朕自甲子年至今六次南巡詳觀河形一年異於一年治河之道當

看何處關係緊要便保守何處不可執一自古治河皆順水性為今之計但當使淮水稍洩其流乘水未長時預為綢繆將來水雖大長必不致於危險天然壩一帶舊有河形當挑濬此河酌量可容糧艘建立閘座水小則閉閘蓄湖水以敵黃水大則開閘使之暢流一面由武家墩通至運河一面通至高郵湖則商民船隻皆得長行爾即公同在河能員定議具奏

五月癸丑

上諭河道總督張鵬翮等曰古今治河形勢不同舊時常患清水不足敵黃水每有黃水倒灌之虞今清水敵黃水有餘運河清水甚大反流入高郵湖設高郵湖水長溢入運河則運河東隄受險少有疎虞雖堵塞不難而生民田廬不可問矣應加謹防護以保無虞清口湖水七分敵黃三分濟運今應將大墩分水處西岸草壩再加挑寬大使清水多出黃河一分少入運河一分則運河東隄不致受險又於蔣家壩開河建閘引水由人字



河芒稻河入江新修五里滾水壩由下河及廟灣等處  
入海不惟洪澤湖之水可以宣洩而盱眙泗州積水田  
地亦漸次涸出水小則下板蓄水以敵黃水大則啟板  
洩水且便於商民舟楫往來其祥符閘口門甚窄狹趁  
此黃水不甚高之時將歸仁安仁利仁三閘委幹員改  
寬洩水則徐州一帶民田可無淹沒之虞矣

康熙四十七年戊子五月辛巳工部議河道總督  
張鵬翮疏言高家堰下山陽盱眙二處增設救生

椿銀兩請另行設法不動庫帑應無庸議

上曰朕南巡閱河見洪澤湖風浪危險隄岸陡立商民船隻觸石損壞傷人甚多朕心時切軫念因特令河臣沿河隄創設救生木椿自設椿以來數年內竝未損船傷人於商民大有裨益此椿應時加增修愈多愈善嗣後著江寧蘇州杭州三處織造每歲於節省銀內各捐五百兩解送總河衙門以備救生之用該省逐年增修存案不必奏銷如不實行修理於別項支用者從重治罪

康熙四十八年己丑十一月庚寅

上諭戶部尚書張鵬翮曰河工雖奏績然不可一日不防  
倘兩隄稍有疎忽則前功盡棄蓋河源出於崑崙朕曾  
遣官往視上流水長則陝西河南江南之水俱長知之  
甚詳爾可宣旨趙世顯令行文川陝總督甘肅巡撫倘  
遇水大之年黃河水漲即著星速報知總河預為修防  
始得保全也

康熙四十九年庚寅十二月庚辰河道總督趙世

顯摺奏御壩西壩工程請修築加長

上諭大學士等曰御壩西壩關係緊要甲子年朕南巡時  
清流不暢黃水倒灌以致洪澤湖上流淤墊朕指修御  
壩西壩清水遂暢然流出黃水不致倒灌淮黃交會之  
區始得安瀾但其地甚卑濕彼時朕步行閱視十餘里  
泥濘沒膝指授方畧總之治水如治天下得其道則治  
不可用巧妄行靳輔善於治河惟用人力于成龍心計  
太過張鵬翮但遵舊守成法而已張鵬翮係漢人豈能

乘騎在在馳驅料理惟於朕諭遵行不違是以河工底績耳今御壩西壩加長工程俱如所請令及時興工修築

康熙五十年辛卯二月戊辰

上諭大學士等曰河務甚難朕昔因挖子牙河親身往視有大城武清縣民跪於兩岸互相爭訴朕慰之曰爾等勿得爭競朕自有處置之法因一一指授監修官員而回後河工告成於兩處百姓均有裨益前張鵬翮任總

河時來陞見朕訓之曰爾於河工不可任意從事但守成規遵奉朕諭而行及修御壩之時朕親身指授釘椿張鵬翮遵朕指授修建自此壩告成清黃二水始會流入海矣黃河水性善於更移朕幸寧夏時由黃河行二十一日至湖灘河朔因邊外無修治之人故黃河處處更移視水性每向南流北岸尚可南岸多被衝決古時黃水由天津碣石而流此言載在書經禹貢後又移流在德州自後漸移於南方矣治河固宜順水性亦在隨

時調度今使諸水入大海者豈盡隨水性哉

康熙五十五年丙申十月丙申河道總督趙世顯  
疏言管河官員遇有丁憂回籍者請仍留河工効  
力

上諭大學士等曰河工告成二十餘年善後之方不可不  
講在工之人必年久諳練方能辦理譬如行軍務須曾  
經出征者始於營伍熟諳况黃河之水遷徙不常最難  
疏治如下埽築隄建挑水壩非久於其地之人不能熟

悉著照所請行但築隄亦有不同黃水難於修築而易於保固清水易於修築而難於保固此又不可不知清水暢流可以刷沙使河水深通永無倒灌之虞然欲使清水暢流必全閉六壩使盡由清口而出方能敵黃朕昔南巡乘船閱河隄內居民厯厯可見今於隄內望黃河行舟帆檣皆不可見可知近日河水之深矣

康熙五十七年戊戌三月壬子

上諭大學士等曰朕昔南巡時曾乘舟閱視沛縣在運河



之西隅地勢窪下積水甚多常因運河水淺穴隄引所積之水洩入運河今看每年沛縣之田皆以被水災具奏特以沛縣地勢窪下常被水災遂視為一定之事雖不成災亦以成災奏請蠲免錢糧耳將沛縣所積之水作何區畫與民有益之處爾等會同九卿議奏

康熙六十年辛丑四月庚子

上諭大學士九卿等曰朕於河務留心最切經歷最深往年屢次閱河時精力尚強親乘小舟不避水險各處周

覽凡水泉源委皆知之甚悉山東運河全賴衆泉蓄洩  
微山諸湖以濟漕運今山東多開稻田截湖水上流之  
泉以資灌溉上流既截湖水自然無所蓄潴安能濟運  
水在地中如人身之有血氣血氣有餘方可用滲洩之  
藥若血氣不足正需滋養安可再加滲洩乎地方官未  
知水之源流一任民間截水灌田以為愛恤百姓不知  
漕運實因此而悞也若不許民間偷截泉水則湖水易  
足湖水既足自能濟運矣今不講究本源但見湖水日

少河身日淺徒事開濬假使河身日深泉水不繼雖費百萬帑金終歸無用且古人所置南北諸閘更將何以處之古人置閘其遠近疎密皆因地形高下水勢緩急以為蓄洩或一處二閘或一二十里一閘確有一定丈尺不可更易分水龍王廟閘座尤關緊要當時宋禮用白英老人之策築戴村壩以遏汶水導之出鵝河口入南旺湖然後水流南北以分水口為水脊蓋山東登萊諸山之脉自關東來結為泰山是北幹分支之一在黃

河之東而黃河之西山脉自終南太一南屆淮汝為中  
幹分支之一黃河行乎兩支之中故昔時河自天津入  
海以後漸徙而南至淮安入海而登州以上馬谷山以  
下從無黃河之迹者山脉限之也分水口之水脊又為  
泰山分支之分脊處白英積數十年精思確有所見定  
為此議宋禮從之因勢均導南得七分北得三分增修  
水閘以時啓閉漕運遂通此等膽識後人實所不及亦  
不能得水平如此之準也今此二閘最宜斟酌啓閉若

淺於南則當閉北開使分北之水亦歸於南淺於北則當閉南開使分南之水亦歸於北湖泉竝注南北合流雖有旱暵亦無慮矣豈若徒事開濬勞費而無益乎往年山東百姓欲開新河朕恐其下流泛濫降旨弗許今巡撫請開彭口新河北地一面為微山湖一面為嶧縣諸山更從何處開鑿耶著張鵬翮到山東將朕此旨詳諭巡撫申飭地方官令其相度泉源蓄積湖水俾漕運無悞特易耳黃河關係最大自元至明歲有衝決未

有安瀾二十年如今日者然圖治於已治保安於已安  
河工雖已告成尤當時加巡視不可疎忽今春多風而  
少雨恐秋間雨水必多地方官宜加意隄防張鵬翮去  
看山東運河由臨清起至韓莊閘韓莊閘離邳州不遠  
并往視邳州低窪之水曾否洩出太行隄有坍塌之處  
亦當往看有賢能司官多帶幾員去地方有用著之處  
即留彼處料理

九月甲午

上諭大學士等曰黃河遷徙無常每有衝決隄岸淹沒田廬之患昔黃河會九河從天津入海後漸遷徙而南約計遷徙之地已千餘里矣漢武帝塞瓠子口嗣後代有衝決朕留心河務屢行親閱動數千萬帑金指示河臣修築高家堰石隄及凡應修築之處奏安瀾者幾四十年於運道民生均有裨益前巡幸至湖灘河朔保德州橫城潼關孟津徐州宿遷邳州桃源清口等處俱曾渡河自橫城順黃河下流歷人所未經行之河套凡舟行

二十二日直達數千里所至之處無不詳視惟孟津渡河時因淤沙不能直渡委折而行彼時朕即慮沙淤則流滯隄岸必致衝決今據報黃河衝決流入沁河泛溢至直隸長垣縣等處若今冬將決口堵築堅固可保無虞否則自決處以下勢分沙壅河水陡長隄岸之危非一所矣昨趙弘燮奏河決之處或在瓠子口以上或在瓠子口之下并河道情形著詳問九卿及在京河南省官員具奏



壬寅

上諭大學士九卿等曰直隸總督趙宏燮奏河南黃沁衝決隄岸水勢泛溢至長垣等處朕即遣官查視所決地方據奏河南武陟縣黃沁之水衝決隄岸由長垣流入山東張秋鎮又據山東巡撫李樹德奏河水泛溢自直隸開州流入山東張秋鎮由鹽河入海以致運河隄決漕船阻滯其衝決隄岸見在修築朕思此衝決之處只可畧加修防使漕船無阻如竟行堵塞水無歸洩之地

他處又必衝決斷乎不可開州係古黃河故道今黃沁  
泛溢由開州至山東地方已成河道矣將來堵塞完工  
不使沁水入黃直引至山東或有裨益亦未可定朕留  
心河務各處黃河渡口俱曾親歷適遣往省河之官所  
呈圖樣及李樹德所進河圖朕俱詳覽知之最明爾等  
繕寫諭旨發往張鵬翮處伊所審事畢著即會同總漕  
施世綸至張秋鎮等處詳行查勘料理使漕船往返不  
致遲悞如張鵬翮已回即於接旨之處作速前往至修

築決河甚屬緊要朕自京中另遣專官著總河趙世顯將熟練河務官員工役派出并將修築物料多行備辦速發往河南衝決地方

丙午

上諭大學士等曰朕因黃沁二水泛溢漫及長垣等縣曾諭爾等以堵塞之後不使沁水入黃引入山東漕河於運道民生大有裨益爾等可將此河圖發與九卿共閱即著定議具奏將來引沁入運之後遇水大時流至天

津恐河身不能容納必令於鹽河洩其水勢方可無虞  
直隸山東河南被水之民應行賑濟著該督撫各行查  
奏

丙辰

上諭大學士等曰堵築黃河漫溢工程此第一緊要之事  
著副都御史牛鈕侍講齊蘇勒員外郎馬泰前往監修  
其堵築時宜先於上流建挑水壩以殺水勢俟沙淤後  
再漸次加築則漫溢之勢自平而堵塞不甚費力矣朕

於清口建築挑水壩時曾經指示此事齊蘇勒馬泰等  
悉知之至於前項工程毋得吝惜錢糧河南地方河底  
不凍今冬宜作速興築其建挑水壩之時應挑引河黃  
河有曲折之處即成洲渚務詳勘酌量取直挑成引河  
俟黃河決口堵塞報竣之後再引沁河濟運分水龍王  
廟之中八閘北八閘春時水淺船行有阻應將沁河之  
水於此處引入運河如不能容納由鹽河瀉其水勢自  
於運道大有裨益分水龍王廟南八閘水多不需水濟

朕另有旨與張鵬翮令學士格爾布前往宣諭再徐州  
下流黃河可以無虞獨徐州上流黃河多有沙淤不可  
不預防衝決將此旨宣諭該管各官宜先防備

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十四

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十五

治河三附運河

康熙三十五年丙子六月戊戌先是

上以每年漕運遲滯命大理寺卿貝和諾往漕河封閘蓄  
水故糧艘抵通較速於昔至是貝和諾回奏

上曰濟寧以南各閘止賴一嶧山湖之水以濟其流豈可



令其啟閘不時耶此法既於漕運有益著每歲遣官行之

康熙三十七年戊寅十二月丁未

上諭大學士等曰運河一帶惟黃水清水交匯之處甚屬緊要此處得宜則他處易治前日于成龍亦謂大墩地方緊要此處修築堅固始可無慮此言極是夫河務深微不訪土著之人不可而全聽其言亦不可如向日天妃閘以板阻水啟板行船須五六百人撻挽方得過閘

今已平緩船隻不需撻挽坦然而行以此觀之乃時候之不同也

康熙四十三年甲申十月戊辰朔

上諭內務府郎中齊蘇勒曰要兒渡東旺西旺等處運河兩邊向來皆沙其隄工係沙土築成故不堅固且又敵數處山水兼之海潮一日二次倒灌所以逼回運河之水不及流行常漲滿盈出於隄者因不能容受之故朕前閱楊村相近有舊河形迹一道即於此間建減水石

壩以分水勢甚為有益此處近海疏通甚易所分之水  
不可使通百靈港寶坻縣香河縣此三處地勢低窪難  
以抵敵至建造減水壩須口寬四五十丈以石鋪之使  
尾長而斜堅固修築若水長不至四尺不能越減水壩  
可將見存舊河形迹挑寬十丈將土即築兩邊之隄爾  
會同直隸巡撫李光地前往驗看丈量具奏

己巳

上諭大學士等曰曩日要兒渡等處隄岸常被衝決是以

朕親臨遍視見楊村原有一引河去海尚近即欲疏此  
引河建滾水壩水長開閘使河水入海因需餉浩繁又  
恐無益故不輕舉朕今遣李光地等往估欲仍開此引  
河大都天津海潮至時一股向王慶坨一股向楊村逆  
流故河水長時即相觸旁流以致隄岸衝決今將楊村  
舊引河挑濬建壩自必有益再子牙河廣福樓亦有引  
河昔開引河時文安大城百姓謂開河於彼有益而青  
縣等處百姓則稱開河於彼不便互相爭論皆集河干

各控其情及朕諭以挑此引河不獨便於文安大城而青縣亦自無虞民始各退後果兩處皆便矣

癸巳

上巡幸畿內臨閱齊蘇勒等所勘薛家莊擬築減水壩之處

諭大學士等曰此處迎溜頂衝若築減水石壩遇水漲時石壩雖不妨而兩邊土壩可虞如水漲過四尺由減水壩流出視其流高幾寸可算知一晝夜水洩幾分如能

流洩水之三分則大有濟矣此處河勢南岸露出磯嘴  
北邊暗被衝刷今已近北岸矣朕向巡幸西塞之外見  
黃河一邊露出磯嘴則一邊必然衝刷水性原如此朕  
故知之此處斷不可築減水壩也因問之土民皆云三  
十年前河原近南岸衆皆驚服

甲午

上閱視筐兒港隄工

諭齊蘇勒等曰昨日踏勘之處迎溜頂衝彼處若築減水

壩甚為可虞倘水發時衝刷其東則所築減水壩反在河中徒費人工矣其楊村以南河岸離隄雖遠而相其地勢亦難修築此筐兒港近處有磯嘴與河隄相去不遠且河路又直通舊河取道甚順况東邊原因修築堅固屢經大水並無妨礙此處修築減水壩甚好朕製木椿式樣與之減水壩兩邊鴈翅須令加高與隄平其外邊流水之處盡用石鋪預鑿兩路柱眼其上則搭橋以便行人築減水壩時須令其尾長如此則下注之水可

無妨礙若欲保減水壩之水溜當於東邊酌量修築數處挑水壩以分頂衝水勢俟後再定至新挑河兩邊築隄則兩邊田地之水為隄所阻不能流出或恐不利於田地若使通於新挑河及分減大河之水令入漯河淀湖內則水集而滿必致泛溢恐民田地淹沒可將湖邊丈量圈築小隄使水不致漫流以保護田地修築大河兩邊隄工附近居民俱請加高朕看此隄加築大有裨益可將此隄先修俟工部堂官到日爾會同前來將舊



隄加高之處丈量估算需用錢糧幾何具題之日再將  
修築減水壩之處定奪

康熙六十一年壬寅六月丙寅

上諭大學士等曰秦家厰隄工楊宗義牛鈕不能堵築馬  
營口所出之水想又如去年流至直隸長垣縣等處著  
行文直隸總督趙宏燮查者民間房屋地畝有被水淹  
者加意撫綏毋致失所此水泛溢必由張秋流入運河  
於漕船亦有關係著山東巡撫李樹德親身前往監看

料理修治若水勢甚大可引入鹽河流洩使漕船可過  
毋致有悞

附北河

康熙二十九年庚午六月丙寅

上諭內務府玉泉山河水所關甚鉅西山一帶碧雲香山  
卧佛寺等山之水俱歸此河從前此河由青龍橋北匯  
入清河後因欲引此水入京城將高處挑濬河之兩旁  
復加謹防固以分水勢今值霪雨之際水勢漫溢隄岸

衝決數處爾等速將閘板啟放使河水暢流一面令工部將衝決之處速行堵築

康熙三十七年戊寅二月庚午

上諭大學士等曰霸州新安等處此數年來水發時渾河之水與保定府南之河水常有泛漲旗下及民人莊田皆被淹沒詳詢具故蓋因保定府南之河水與渾河之水匯流一處勢不能容以致泛濫渾河著左都御史于成龍往察保定府南河著原任河道總督王新命往察

作何修治令其水自分流詳省繪圖議奏今值農事方興不可用百姓之力遣旗下丁壯備器械給以銀米令其修築伊等往時部院衙門司官筆帖式酌量奏請帶往於十日之內即令啟行

三月丁丑

上諭直隸巡撫于成龍原任河道總督王新命曰清河發源太行山脈會漳河子牙河滹沱河易水諸流其勢雖盛但堅築隄岸以遏之即歲潦亦可無虞又漳河支流

經大城縣入子牙河其勢湍悍數年以來文安大城諸處屢遭水患皆此河之故也爾等宜詳悉查勘至渾河發自馬邑其源甚微每遇大水之年則橫流泛濫致淹民田詳審其故蓋由渾河淤沙既多或遇春時水乏保定以下居民又引河水灌田沙礫壅墊河身積高霖雨水發則避高就卑水勢瀰漫遂致田土衝沒爾等惟挑濬淤沙河之兩岸掘五六尺深濶令水得暢流當不至於漲溢矣爾等須詳視具奏築隄濬河工竣設立河夫

委官監視及時預為挑濬遇旱歲力去淤沙庶無水患  
矣

辛卯直隸巡撫于成龍以渾河圖形呈

覽

上曰朕經行水災地方見百姓以水藻為食朕曾嘗之百  
姓艱苦朕時在念是以命爾於雨水之前速行濬河築  
隄使田畝得耕百姓生計得遂也

五月甲戌朔

上巡視武清縣隄岸衆民跪奏曰要兒渡地方自蒙

皇上修築迄今永無水患此地隄岸正當水勢衝射請於

隄岸之外另築一隄

上諭曰此隄岸之外若另作一隄爾等田畝豈不多致占

廢衆民奏曰原非一家田畝即稍入隄內於小民亦無

大損倘河水一決其患更甚

上諭曰轉盼間雨潦將屆今歲不及修築暫立木椿堅護

隄岸另開小河以殺水勢今歲田畝可以無虞俟明春

雨水前另築重隄爾等田廬俱得安固矣

康熙三十八年己卯二月壬子

上諭直隸巡撫李光地等曰漳河與滹沱河故道原各自入海今兩水合流所以其勢氾濫爾等往視如漳河故道可尋即可開通引入運河如慮運河難容即於運道之東別挑一河使之赴海其可否修浚情形爾等閱後再奏

十月甲戌



上巡視永定河隄至蘆溝橋以南

諭原任河道總督王新命等曰此河性本無定溜急易淤沙既淤則河身墊高必致淺隘因此泛溢橫決沿河州縣居民常罹其災今欲治之務使河身深而且狹束水使流藉其奔注迅下之勢則河底自然刷深順道安流不致氾濫今朕遍觀兩岸將緊要應修處逐一詳審爾等務期次第修築遵諭而行

乙亥

上閱北蔡村夏莊村南蔡村等處

諭原任河道總督王新命等曰於此三處從上流作挑水壩不必過長長則大溜為其所逼對岸淤處畧加挑濬水即瀉入直流矣著候明春興工又

諭曰官不清則為民害水不清亦無利於民天下之濁者皆如此也不清之官朕有法以正之不清之水朕有策以治之

丙子

上至郭家務村南大隄以豹尾鎗立表於冰上親用儀器

測驗

諭原任河道總督王新命等曰測驗此處河內淤墊較隄外畧高是以冰凍直至隄邊以此觀之下流出口之處其淤高必甚於此如此壅滯安能暢流此等隄工卑矮可虞若不預行修築明春水發難以堵禦必自今冬下埽加幫增高不可取近隄之土若取土成溝水流溝內有傷隄根著取近河土用之即運土稍遠亦無不可也

辛巳

上諭直隸巡撫李光地原任河道總督王新命等曰今永定河自郭家務以下壅淤已高出七八尺若掘畢方濬河身不但多需工力必致歲歲壅淤南隄之南地最窪下若隨其窪下濬治於掘出之土即行釘椿築隄堅固則修理最易抑且北隄三層於河更屬有益爾等修理時可將河口修窄漸次放寬於兩邊築隄使高大則水勢迅急沙自不能停住矣若遇村莊近處宜詳視妥當

委曲遠移或砌之以石與村居無礙始行修理俟新修河工告竣朕親臨視開放河水

康熙三十九年庚辰二月乙亥

上諭大學士等曰朕往閱永定河見河工諸員並無知曉因朕指示周詳河工諸臣方悟而大悅總之經任河務者勤而且廉即克底績此河告竣則黃河亦可倣此修之朕御小舟入郎城等淀淤淺之處徧視之則河之當移柳岔也益無疑矣郎城之河全被沙淤墊高至來年

可耕為田而欲於此處出水直強之耳水口所關重大  
若非親臨目擊可輕斷乎至治河大臣畏縮不前反再  
三陳奏以為不可行者今復何辭又

諭曰郎城之遙隄甚有用清水渾水俱以此當之新河開  
畢著即修築南北兩岸遙隄完工之後交地方官各自  
分守稍有損壞處用民夫補修著傳諭直隸巡撫李光  
地朕將於四月來臨不時遣人察視爾等敬慎無忽

四月庚辰

上巡視永定河隄

諭大學士等曰朕前者到此曾指示挑濬河灣令其下椿  
今日觀河水已涸乘此水涸之時易於成功其徑直挑  
濬處須令寬濶即以所挑之土培築隄岸甚為有益見  
無雨水二十日可以告竣目今東作方興夫役難於驟  
僱八旗並包衣屬下每佐領派護軍驍騎各二名步軍  
共一千令其挑濬凡人員廢官有願濬河効力者亦令  
前往

康熙四十年辛巳四月戊寅

上巡閱竹絡壩河道

諭直隸巡撫李光地等曰莽牛河出水之口亦宜下埽防之隆冬冰結之時莽牛河口著照常開洩清水流於冰下則水為冰所逼向下衝刷河底自然愈深又

閱新修石隄諭曰朕修此石隄特欲其堅而更堅之意如此則河水斷不復歸舊河此地黎民亦可安枕矣又

閱竹絡壩迤東河道大灣諭曰此地正當頂衝甚為危險



見今此處續修石隄尚未興工著速取南方運來杉木  
即下排椿及埽堅固修築又

諭曰觀新挑河道水流既直出柳岔口亦順河岸較前甚  
高而河亦深此皆被莽牛河水衝刷之故閱其地勢南  
岸最為要緊故將應行堅修諸處詳行指示爾等勿謂  
其已成而遂忽之

附水利

康熙二十六年丁卯十月壬戌大學士等議覆河

道總督靳輔疏言於高家堰之外再築重隄停止  
丁溪等處工程應如所請

上曰朕今挑濬此河原欲有益七州縣生民靳輔疏稱高  
家堰等處築隄以為屯田可獲百餘萬錢糧朕從利益  
民生起見非為錢糧也若止為錢糧起見則不必蠲免  
江南陝西應徵六百餘萬矣此挑河關係緊要著戶部  
尚書佛倫吏部侍郎熊一瀟給事中達奇納趙吉士會  
同江南總督總漕確勘議奏

康熙三十九年庚辰九月庚戌福建道御史劉珩  
疏言直隸永平真定等府田地應令巡撫李光地  
視其近河之處引水入田耕種

上諭大學士等曰水田之利朕所洞悉已交李光地見令  
引水耕種水利一興田苗不憂旱澇歲必有秋其利無  
窮但不可太驟耳今若竟定一例諸處剋期齊舉該部  
復行催查則事必至於難行矣亦惟興作之後百姓知  
其有益自然鼓舞各相效法於是因地制宜設法行之

事必有成今觀此處亦不必開池惟如寧夏水田開濬溝渠潦則撤田中之水自渠出之旱則放渠之水引入田中災荒總可無虞矣

康熙四十五年丙戌三月壬戌大學士等議覆直隸巡撫趙宏燮疏請開墾水田應准行

上曰此處水田不比江南與寧夏澤州等處水田約畧相似大都俱恃開溝以引河水今直隸河道處處俱通若開通三河縣河亦可直抵薊州昔開護城河甚有利益

今朕又欲挑濬清河此河一開於右翼人衆亦大有利益矣

康熙四十六年丁亥十一月乙亥

上命江南浙江兩省在京官員齊集乾清門外

召大學士張玉書等入諭之曰朕在宮中無刻不以民間疾苦為念恐遇旱澇必思豫防至巡幸各省於風俗民情無不諮詢即物性土宜皆親加詳考今歲南巡江浙見天氣久晴所經河渠港蕩之水比舊已淺即慮夏間

或有亢暘之患是時麥秋雖見豐稔然南方二麥用以  
為麴蘖者多不似北方專需麥食南方惟賴稻米北方  
不獨種稻兼種黍稷梁粟此水上異宜不可強也且江  
浙地卑下不雨則蒸濕人不能堪有雨則涼燥人皆清  
爽雖稱水鄉然水溢易洩澇歲為患尚淺旱歲為患甚  
劇若北方則經月不雨亦無礙南方夏秋間經旬不雨  
則田皆坼裂禾苗漸槁矣故喜雨亭記云十日不雨則  
無禾也江浙農功全資灌溉今見其河渠港蕩比舊已

淺者皆由素無滯蓄故雨澤偶愆瀕河低田猶可戽水  
濟用高燥之地力無所施往往三農坐困朕茲為民生  
再三籌畫永遠之計無如興水利建閘座蓄水灌田之  
為善也江南之蘇松常鎮及浙江之杭嘉湖諸郡所屬  
州縣或近太湖或通潮汐所有河渠水口宜酌建閘座  
平時閉閘蓄水遇旱則開閘放水其支河港蕩淤塞者  
竝加疏濬引水四達仍行建閘多蓄一二尺之水即可  
灌一二尺之高田多蓄四五尺之水即可灌四五尺之

高田行之永遠庶高下田畝無憂旱澇矣朕特念江浙財賦重地小民粒食所資故欲講求經久之策著該部速行文兩省督撫將各州縣河渠宜建閘蓄水之處通行確查明晰具奏以朕度之建閘之費不過四五十萬兩且南方地畝見有定數而戶口漸增偶遇歲歉艱食可虞若發帑建閘使貧民資傭工度日餬口亦善策也



大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十五

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十六

澄敘

康熙四年乙巳三月壬辰

上諭吏部都察院民生之安危由於吏治之清濁吏治之  
清濁全在督撫之表率若督撫清正實心愛民則下吏  
孰敢不潔已秉公近見各省督撫彈章祇將一二衰老

微官塞責豈所屬地方果無貪酷害民之輩總由姑息徇庇莫肯直糾吏治民生安所恃賴爾部院職任澄清督撫中有不肖昭著者即行叅處以後督撫糾劾官員除情輕者照例處分外其列款貪酷者即行解任究審儻因循舊習不肯實心任事一并治罪

康熙六年丁未二月戊辰

上諭吏部兵部都察院國家政務委任庶官必內外大小臣工咸得其人乃可共襄治理京察大計軍政俱應於

今歲舉行將內外大小各衙門滿漢文武官員分別澄敘以勵官方應行事宜爾部院察例議奏

十一月甲子吏部遵

旨議覆工科給事中李宗孔疏請復行薦舉查考滿停止見行大計既有三年卓異之官似毋庸又行薦舉應仍照前議其所舉卓異之員不論本任內及陞轉任內一有不職應將從前申詳薦舉等官分別降革

上曰前卓異薦舉原係竝行後因舉行考滿將薦舉停止  
舉劾關係勸懲大典今考滿既經停止薦舉仍著復行  
其卓異官原任有事舉薦官理宜處分至後任有事仍  
將前薦舉官處分永塞薦舉之路又所擬處分之例太  
過著再定議具奏

康熙七年戊申六月戊子

上諭戶部向因地方官員濫徵私派苦累小民屢經嚴飭  
而積習未改每於正項錢糧外加增火耗或將易知由

單不行曉示設立名色恣意科斂或入私囊或賄上官致小民脂膏竭盡困苦已極朕甚憫之督撫原為察吏安民而設布政使職司錢糧釐剔奸弊乃其專責道府各官於州縣尤為親切州縣如有私派濫徵枉法婪贓情弊督撫各官斷無不知之理乃頻年以來糾疏甚少此皆受賄徇情故為隱庇即間有糾叅非已經革職即物故之員其現任貪惡害民者反不行糾叅甚至已經發覺之事又為朦朧完結此等情弊深可痛恨嗣後如

有前弊督撫司道等官不行嚴察揭叅或經體訪察出或被科道糾叅或被百姓告發將督撫一并嚴處不貸至爾部收納直隸各省解到錢糧亦須隨到隨收速給批迴毋得縱容司官筆帖式書辦等勒索作弊苦累解役倘有違法即行叅奏如不行嚴禁察出將堂司各官一并從重治罪又言官於作弊害民者理應察訪指名糾叅乃近日章奏大率摭拾細故苟且塞責嗣後當據實陳奏毋得挾私讐害爾部即遵諭速行直隸各省大

小官員刊示曉諭百姓

康熙八年己酉八月壬申

上諭吏部國家政務惟藉羣工贊理在京各衙門大小官員必各稱其職乃可以襄郅隆之化部院等衙門滿漢各官應行澄叙以示勸懲大學士尚書及三品以上堂官俱著自陳三品司官及四品以下各官爾部會同都察院詳加甄別具奏在外總督巡撫係封疆大臣職任緊要著該部院查明任內功過稱職與否詳加甄別具



奏

康熙十年辛亥五月辛酉

上諭兵部武官有防守地方緝捕盜賊之責必弓馬熟嫻方克勝任其不稱職者雖總督提督有不時糾叅之例但與其糾叅於後貽悞地方不如於選授之時詳加選擇以後除見任推陞各員外凡係應到部掣籤之官爾部即考驗弓馬然後令其掣籤如有不堪者即行題明照例給以原品頂帶停其補授

十二月癸未

上諭兵部侍郎色塞赫等曰每見爾部題授江南浙江西  
安諸處章京俱係有資力者於盛京寧古塔諸處員缺  
則屬之貧弱之人豈無情弊又護軍校即陞佐領亦屬  
越次不公爾部宜詳察之

康熙十七年戊午五月己酉

上諭吏部兵部向以閩省海疆要地雖經恢復海逆未平  
民生凋敝撫綏防禦惟在文武大吏相與殫心料理方

於兵民有裨今總督郎廷相提督段應舉自簡任以來  
為時已久山谷之伏莽未靖閭閻之困苦未蘇吏治未  
見澄清營伍漫無整頓寇警頻聞地方躡擾更有甚者  
海賊侵犯內地事前不能豫防事後不能勦禦皆由該  
總督提督庸懦無才職業不修所致殊負簡任之意仍  
令在任貽悞封疆著康親王傑書察議具奏

康熙十九年庚申五月庚寅

上諭大學士等曰雲南巡撫伊闢疏請將隨行人員坐名

題補朕思此等人員果堪用者亦復何害乃一時倉卒  
奏請往往不能盡當如知府知縣等官俱將此輩補授  
徒悞地方此後坐名題補各官概行停止吏部仍照例  
銓選

八月己卯

上諭吏部科道為耳目之官關係最要必選用得人方能  
稱職漢官皆由行取考選補授惟滿官論俸敘陞著吏  
部都察院將見在滿洲給事中監察御史會同選擇堪

用者仍留原任不稱職者對品調補部院衙門

康熙二十一年壬戌九月癸酉戶部引

見各部院保舉關差官員以蘇赫臣辦事有才與其列

上曰凡部院司官果能謹慎奉職方不僨事如蘇赫臣及  
科臣莫洛輩俱狂妄自恃雖有才幹亦無足取可另行  
保舉以聞

康熙二十三年甲子正月壬辰

上諭大學士等曰各部院司官內才力庸劣者曾降旨令

不時糾叅然叅處者甚少雖有一二糾叅皆係末員其實係庸劣無能多徇情面不行糾叅又有狂妄好勝專恣行事者較之庸劣無能為害更甚各部內朕所明知而徇情不叅者亦有之可嚴諭部院衙門查各屬司官內有庸劣無能狂妄好勝專恣行事之員即行指名題叅

丙申

上諭大學士等曰副都御史塞克德自簡任以來並未見

陳奏一事才具庸劣可令解任朕觀部院官員懶惰者甚多一遇苦差或有稱病規避者嗣後部院官員或病或有事故俱註冊以憑分別勤惰又

諭曰督撫乃封疆大臣通省民命所關

世祖皇帝時所用者尚屬循良逮至輔臣時用張長庚白如梅張自德賈漢復屈盡美韓世琦等擾害地方以致百姓困苦今之督撫較前雖覺稍愈而相沿成習尚未盡改見在浙江湖廣總督江蘇巡撫員缺最為緊要必

擇賢能補授方於地方有濟如不得其人則百姓受害不可勝言矣此三缺爾等加意詳審務得相宜之人公同舉出聽候酌用

五月辛巳

上諭大學士等曰凡居官以清廉為要今九卿若有確知其  
其人者無論內外大小官員可據實舉奏近聞陸隴其  
居官甚善眾皆稱之諒非矯飾從此操守不改永著芳  
聲是為真實好官耳



十二月己亥

上諭安徽按察使于成龍之父原任阿達哈哈番于得水  
曰爾子于成龍居官清廉惟爾教子有方特加賞賚爾  
其勗勉爾子殫心竭力始終如一朕不難頻加顯擢苟  
末路不終辜負國恩定行懲治亦爾家門之玷也又  
召八旗漢軍都統副都統侍郎等

諭曰國家自

祖宗定鼎以來委任漢軍官員與滿洲一體其中頗有宣

猷効力者如孟喬芳張存仁輩朝廷亦得其用比年漢軍居官者大不如初每赴外任多攜僕從汰侈糜費惟務黷貨累民恣肆放逸未能謹守法度如張長庚賈漢復白色純等不可勝舉屢加申飭尚多因循未見改轍茲者巡行江南見文武各官及軍民人等衆口一辭稱江寧府知府于成龍清廉愛民朕心喜悅已面加獎勵超遷為安徽按察使又特召于成龍父賞賜以示褒美廉吏至意凡爾八旗漢軍人等自今以後悉宜洗心滌

慮痛除舊習或子弟官守在外宜各貽書訓勉果有潔已愛民如于成龍者朕立行擢用如猶怙非不悛國有常法不能為此輩貸也

康熙二十四年乙丑九月辛未

上諭吏部督撫藩臬官資相近請託易行每逢大計各省督撫多以藩臬舉報卓異不無結納徇情之弊著通行禁止

康熙二十五年丙寅二月辛丑

上諭大學士等曰近雲貴督撫及四川廣東巡撫俱疏請  
征勦土司朕思從來控制苗蠻惟在綏以恩德不宜生  
事騷擾今覽蔡毓榮奏疏已稔悉其情由蓋因土司地  
方所產金帛異物頗多不肖之人苛求剝削苟不遂所  
欲輒以為抗拒反叛請兵征勦在地方官則殺少報多  
希冒軍功在土官則動生疑懼攜志寒心此適足啟釁  
耳朕但以逆賊勦除四方底定期於無事如蔡毓榮王  
繼文哈占身為督撫不思安靜撫綏尚誅求無已是何

理也前出征雲南趙良棟將彼等過端幾至發露穆占之家人舉首朕寢其議若此等尚多朕無不洞悉但事係已結朕不復究置之寬宥至雲貴督撫居官殊無善狀或地處遼遠朕不悉知亦未可定爾等將此諭旨傳示九卿詹事科道令其詳議具奏

四月甲辰

上諭領侍衛內大臣公卹黑福善坡爾盆等曰學士常書原係微賤之人理應仰體朕委任之意効力圖報考試

之事乃伊職掌應立法嚴肅查察情弊乃於懷挾諸弊明知不舉惟於朕前蒙蔽行詐見今發覺被獲應將常書革去學士改為三等侍衛照常行走

七月庚戌

上諭吏部翰林官員內或有不善書法者或有不換講章者或有不能句讀通鑑者甚有以飲酒宴會為事博奕為戲者其讀書立品思副委用裨益國事者甚少今若依部議道缺調用恐伊等登第之後未經敷歷驟任

監司則無才之人反為僥倖何所懲創應以學問不及者分別一二人降調庶衆皆知儆著吏部翰林院學士會議具奏

十月壬申

上諭大學士等曰鎮國公哈爾薩為人鑽營有玷公爵應將此公爵令伊兄六格襲替蘇努雖係宗室其行事乃如人之奴僕在安親王及索額圖家諂媚行走至在議政處但遇勢要之人發一議論伊輒唯唯聽從不敢更

有論說其阿順之態與家奴無異爾等將此旨傳諭哈爾薩蘇努二人

康熙二十九年庚午正月甲寅

上諭吏部用人之權關係最為重大于成龍破壞定例將曾經超擢歷年未久如許官員保題爾部不以為非但稱無庸議殊屬不合且既云直隸好官甚多今竝不能拯救饑民頻多流散如此則平日才能所辦何事武廷适等陞轉著停止令其在任久遠効力



康熙三十一年壬申十一月戊辰

上諭大學士等曰嗣後所叅才力不及官員仍補授部院衙門殊未允當既因才力不及議處若仍補授錄用有何裨益著照伊等所降之級隨旗行走則旗下官員增多且伊等曾在部院辦事自能稱旗下之任至因公註誤降級而復用者若仍算初任年俸仍不久即陞矣應俟復用三年後無過稱職始准算初任年俸則官員方知鼓勵有過者得少分別矣可將此旨明諭九卿

康熙三十三年甲戌十二月戊申

上諭吏部觀部院衙門官員皆係總計年俸補授因而庸常者多爾等傳諭內閣及部院衙門將庸劣之員各行參奏

康熙三十六年丁丑五月丁酉

上諭吏部國家舉行大計原期黜幽陟明使大法小廉以爲乂安民生之本所關甚重比年以來督撫等官視爲具文每將微員細事填註塞責至真正貪酷官員有害

地方者反多瞻徇庇護不行糾叅以致吏治不清民生莫遂重負朕愛養元元至意殊可痛恨今當舉行大典各督撫等官應洗心滌慮力改前轍矢公矢慎整肅官方務期舉薦一人俾衆皆知勸糾劾一人俾衆皆知儆儻仍苟且因循徇私溺職國法具存必不輕恕

壬寅

上諭大學士等曰今噶爾丹已平天下無事惟以察吏安民為要務然官吏之賢否民生之休戚所關朕一人端

居深宮何能徧知昨巡行山陝或先聞其有聲名而居官不善者有之或並未聞其聲名而居官實善者有之此皆上下相隔不能通達之故也雖古聖君以知人為難朕豈料溫保行事一至於此往者江浙山東等處地方官以朕不時巡幸各加勉力操守皆優山陝官員則劣甚朕恨貪污之吏更過於噶爾丹此後澄清吏治如圖平噶爾丹則善矣

十月己酉

上諭兵部軍政大典五年一舉所以黜陟將弁砥礪官方  
使賢者知勸而不肖者知儆關係甚重每見督撫提鎮  
不能實心奉行輒向所屬需索部費恣意誅求因而將  
弁以下節次侵削重為兵害至於所舉所劾或瞻徇情  
面或庇護私交將尅扣額餉虛冒兵糧濫受餽遺虐取  
規例實係貪酷及衰懦闕冗不能騎射之員不行叅劾  
止將微員細事草率塞責以致貪酷庸劣之輩無所誠  
懲而守法奉公宣勞盡職者遏抑不彰無所激勸殊負

朝廷旌別淑慝之至意爾部可即通行各督撫提鎮此次舉行軍政務矢公慎力破積弊俾舉一人衆皆以為賢効一人衆皆以為不肖庶激揚咸當而國家允收得人之效倘因仍陋習不加悔改後有發覺定將督撫提鎮等官一并從重治罪

康熙三十八年己卯正月丁酉

上諭大學士等曰武職官員掣籤後即准赴任雖有庸劣之員該管官多瞻徇情面苟且姑容嗣後武職掣籤官

員著卽引見其庸劣者當罷斥之

五月丙戌

上諭大學士九卿詹事科道等曰朕南巡至浙江見百姓生計大不如前年來已將舊欠錢糧盡行豁免其被災地方概行賑濟恩澤屢加在百姓應比往年豐足今反不及從前者皆因府州縣官私派侵剋餽送上司或有沽名不受而因事借端索取更甚者至微小易結案件牽連多人遲延索詐者甚多此等情弊督撫無有不知

乃不釐剔察叅反將行賄官員薦舉廉正官員糾劾以至民生失所殊失朕愛養元元至意且畿輔重地因朕不時巡察故無私派侵剋等弊若各省督撫俱體朕愛民至意實力奉行自然吏治澄清萬民樂業科道不畏人不徇情能將不肖劣員察訪糾叅則有司亦知忌憚今作何永革橫派嚴禁賄賂以察吏安民爾等會同確議具奏

康熙三十九年庚辰四月辛未



上諭大學士等曰各部院衙門司官皆論俸陞補或因坐  
臺運米議叙陞補以致庸劣者多著諭部院將該衙門  
庸劣司官察叅其司官筆帖式內有才優者亦著保舉  
引見

康熙四十二年癸未五月己未

上諭大學士等曰直隸各省總督巡撫提督總兵官補用  
千總等官秉公者少除功加及稍有優長者俱已錄用  
外其餘年滿千總騎射未必皆能騎射尚且不能豈可

令之管轄軍士著行文各省諭令此項人員限於冬、季  
前到京命大臣監試優者錄用不堪者革退限內不到  
者即令除名可諭兵部知之

康熙四十四年乙酉五月己卯

上諭大學士等曰官員薦舉卓異關係激勸大典必無加  
派無濫刑無盜案無錢糧拖欠無虧空倉庫銀米者方  
可膺卓異之選其他所開虛文俱不必入可會同九卿  
定議具奏

康熙四十六年丁亥五月丙子

上諭大學士等曰部院筆帖式自初任時即當黽勉以冀大用朕見今關差筆帖式有從都統護軍統領之筆帖式派出者問其事務茫然不知著裁去候缺令都統取撥什庫及披甲中知書者用之護軍統領取護軍中知書者用之伊等二三年一換又各門筆帖式亦皆裁去候缺其缺取護軍用之亦二三年一換此外再有應裁之筆帖式亦皆裁去至中書內竟有年方童稚者此皆

徇情補用嗣後補授中書著引見

十月辛丑

上諭吏部今觀部院衙門司官甚是不及至有不能做稿說堂者甄別既經停止若不考察漸至廢弛爾等俱係大臣不可互相徇情或各部院官員有彼此遷轉任事未久者本衙門堂官不能悉知其人可著九卿會同考察叅奏

十一月壬申吏部議覆山西巡撫噶禮疏叅潞安

府知府白邦傑借欠官銀限滿未完請令戴罪完結

上諭大學士等曰凡借官銀者因不能完銀治罪若留任追賠必希圖還債以致剋剝小民矣嗣後凡牧民官員借欠官銀不能完納即令離任追賠已還後准其開復如不能清還即以家產抵償如此則官銀不致虧欠而亦無剝民之事矣

康熙四十八年己丑十二月甲寅

上諭大學士等曰世襲之員較佐領尤為緊要襲職之人庸劣者甚多嗣後令該旗大臣引見如其人善則准令承襲否則不拘其幼子族人擇可用者令其承襲

康熙四十九年庚寅三月戊子

上諭吏部前以補授雲南貴州廣西四川四省官員不能如期到任懸缺甚多故豫發人員備用今觀此等官員但圖以邊俸速陞居官無一善者地方關係甚屬緊要嗣後四省停其豫發仍照舊例歸於月選得缺人員嚴

限速催赴任如此則缺不致久懸而於地方亦有裨益其以前發往未經得缺人員俱著掣回各歸月分補用

康熙五十三年甲午四月丁亥

上諭大學士等曰昔人有言正朝廷以正百官正百官以正萬民舉賢退不肖正百官也二者不可偏廢如但舉賢而不退不肖則賢者知所勉而不肖者不知所懲終非勸衆之道惟黜退不肖之員則衆人方知所戒俱勉為好官矣

十月乙亥

上諭九卿等曰九卿內各省人俱有凡翰林中曾差正副主考及房考者其聲名賢否必皆知之著從公舉出優者陞用劣者革退九卿於本省出差人員不必與議蓋伊等子弟試而中即以為好試而不中即以為不好殊不可為據若不存私意賢否皆從公舉出則科場可得清理矣即如月選官員悉令九卿驗看凡出身不明行止不端者俱知畏懼不敢謁選此甚有益



康熙五十四年乙未四月庚午

上諭吏部凡月選官員與民最親故令九卿驗看今並未將劣員舉出嗣後月選官員內有出身不明或係人家僕及開復官員內從前居官有劣蹟者九卿各據所見即行叅劾黜退如此則吏治咸修民生大有裨益將此傳諭九卿

康熙五十六年丁酉四月丁亥福建巡撫陳瓚疏言會安縣知縣田廣運等徵收錢糧有方居官聲

名俱好惡

聖恩破格鼓舞於吏治民生大有裨益

上諭大學士等曰此奏甚善徵收錢糧惟少加火耗百姓易於輸納從前馬齊任山西巡撫張鵬翮任浙江巡撫時錢糧俱清楚蔣陳錫任山東巡撫時錢糧亦清楚外省總督巡撫居官好少加火耗錢糧斷不至缺欠也田廣運等俱著該部議叙

康熙五十七年戊戌十月甲寅

上諭吏部考試月選官令作八股時文大都抄錄舊文苟且塞責嗣後不必作八股時文止令寫履歷以三百字為限觀其書法妍醜文理工拙則人之優劣自可立見矣

甲子

上諭吏部各部院衙門滿洲官員在侍衛班行走漢官每遇奏事派六員引見科員及御史無論巡城不巡城奏事日令派出滿洲三員漢人三員侍班翰林亦派出五

員侍班此侍班人員內如有不得來者不妨聽其缺少其數不必補足如此伊等可得認識矣

康熙五十九年庚子十月癸亥

上諭大學士等曰科道官係從部員內揀選補授每年內陞外轉竝未論其原陞品級一體開列今科道官內陞有即超擢至堂官者果其卓然特出雖為布衣朕亦可不次任用況科道乎若本屬平常而不查原陞品級竟一體內陞超用未免越次著交與九卿將科道官由何

銜陞任應作何分別開列之處會議具奏

十二月己酉

上諭大學士等曰翰林官員雖多能作祭文碑文者不過數人此內有人才不及不諳進退之禮者亦有一無所知飲酒遊戲者伊等俱候派考試之官如此等人豈堪備用爾等同吏部翰林院查明叅革或人雖平常實有學問者不必革退或年老翰林見在修書行走者亦不必革退又部院衙門滿漢官員內有才力不及并懶惰

者亦會同部院堂官查明叅革

癸丑

上諭大學士等曰朕觀九卿詹事科道保舉人員並非矢公悉有所為或有視地方優劣而舉者或有自謂屏絕交遊閉戶不出而緘口不舉一人者或有自己不舉轉令他人保舉者凡此等情弊伊等以朕為不知朕則知之甚悉也存是心者乃名教中罪人安得謂之讀書人乎如果矢志公忠則伊所舉之人一有改操之處即宜

糾叅矣少詹事龔鐸保舉之人甚多伊竝非外任何所見而濫行保舉耶此風漸不可長宜加懲究使知儆畏爾等會同吏部都察院查從前保人甚多而無當者悉行叅奏

大清聖祖合天弘運文武睿哲恭儉寬裕孝敬誠信中和德大成仁皇帝聖訓卷三十六